

[\(https://news.usm.my\)](https://news.usm.my)

Berita Mutakhir ▾

21 JUN PROGRAM 'SALAM SAHUR' BANGKIT KESEDARAN MAHASISWA



PULAU PINANG, 21 Jun 2015 – Program 'Salam Sahur' berupaya untuk membangkitkan kesedaran dan rasa syukur dengan kesenangan yang ada dalam kalangan mahasiswa apabila kira-kira 150 orang pelajar turun padang mendekati, menyelami dan ringan tulang menghulurkan makanan di sekitar KOMTAR, Padang Kota, dan Pasar Chow Rasta semalam yang dianjurkan oleh Briged Sukarelawan USM.



Menurut Pengarah Projek Nurul Shahida Mohd Zaki, 20, program ini diadakan bertujuan membudayakan kesukarelawan dalam kalangan pelajar.

"Kami ingin melahirkan mahasiswa dan siswazah yang memahami masalah masyarakat, merasainya dan sedar bahawa hakikat ilmu bukan hanya terdapat di dewan kuliah tetapi juga di dalam lapangan sebenar," kata pelajar Tahun 2 Ijazah Sarjana Muda Sains Kemasyarakatan (Sains Politik) tersebut.



Sementara itu, ahli Briged Sukarelawan USM Siti Farhana Samsudin, 21, berkata, program tersebut memberi pengalaman berharga kepadanya dan rakan-rakan yang lain supaya sentiasa bersyukur dengan nikmat yang dinikmati hari ini.

"Program ini secara tidak langsung mampu mengeratkan lagi silaturrahim yang wajar diteruskan pada masa akan datang yang berupaya memberi pendedahan kepada mahasiswa kehidupan sebenar golongan penduduk yang kurang bernasib baik ini," ujar Pelajar Tahun 2, Pusat Pengajian Sains Kimia itu lagi.



Pelajar Tahun Pertama Pusat Pengajian Komunikasi, Izzuwan Bahrin, 21, pula beranggapan pemberian bantuan kepada golongan gelandangan ini wajar diperluas dan diteruskan pada masa hadapan bukan sahaja di kawasan-kawasan tertentu malahan menerokai tempat-tempat baharu yang menjadi sasaran golongan berkenaan.

"Program ini juga secara tidak langsung mampu meningkatkan tahap pemikiran para pelajar kepada pemikiran yang lebih terbuka dan berpandangan jauh serta menjadikan pelajar USM lebih mendepani isu-isu semasa nasional," ujar pelajar pengkhususan Komunikasi Pemujukan itu lagi.



Dalam pada itu, ahli Briged Sukarelawan USM Nor Azami Syawal Ramli, 23, pula beranggapan satu usaha yang lestari bersama Pertubuhan Badan-badan Bukan Kerajaan (NGO) wajar dilaksanakan khususnya bagi membantu golongan berkenaan dan bukan hanya sekadar memberi bantuan makanan.

Katanya, usaha perlu dibuat dalam jangka panjang untuk mendidik masyarakat seperti ini untuk meneruskan kehidupan melalui usaha-usaha yang membolehkan mereka berdikari.

"Inisiatif-inisiatif baharu yang lestari selain pendekatan yang jitu wajar dilaksanakan supaya golongan ini mendapat pembelaan yang sewajarnya, malahan satu platform perlu terus direncana agar nasib golongan ini terus terjamin," ujar Pelajar Tahun 3, Pusat Pengajian Sains Kemasyarakatan itu kepada TVUSM.




Wakil pelajar Universiti Pendidikan Sultan Idris (UPSI), Lailatul Laili Abdul Jalil, 20, pula menzahirkan rasa bangga dan berterima kasih kepada USM apabila dapat menyertai program berkenaan selain berharap agar diteruskan lagi bukan sahaja pada bulan Ramadhan malahan pada masa-masa yang lain.

Mengulas lanjut Lailatul Laili berkata, program tersebut dilihat sebagai satu usaha untuk memupuk dan mengukuhkan diri mahasiswa dalam aktiviti kemasyarakatan.

"Program berkenaan memberi saya satu mesej yang berharga bahawa kita perlu bersyukur dengan apa sahaja yang dimiliki kerana ada insan lain yang kurang berasas baik tidak memperoleh kehidupan yang sempurna, secara tidak langsung sedikit sebanyak mampu menginsafkan," ujar pelajar Semester Pertama Diploma Sains Matematik UPSI itu lagi.

Program yang bermula jam 12.00 tengah malam itu melibatkan kira-kira 150 orang pelajar dan kira-kira 20 orang staf universiti termasuk para pensyarah, pegawai USM serta ahli-ahli USM Super Bikers yang menunggang motosikal berkuasa besar yang turut sama dalam program mengagihkan makanan kepada gelandangan.



Lebih 300 bungkus makanan yang dimasak sendiri oleh para sukarelawan diedarkan dalam tempoh 3 jam aktiviti itu berlangsung.

Program berakhir dengan bacaan doa dan bersahur beramai-ramai di Padang Kawad USM kira-kira jam 3.30 pagi didahului dengan ucapan penghargaan daripada Naib Canselor USM Profesor Dato' Dr. Omar Osman kepada semua peserta dan berharap usaha ini akan diteruskan pada masa hadapan.

"Saya menghargai penyertaan semua termasuk pelajar-pelajar UPSI dan Super Bikers USM serta sokongan kepimpinan tertinggi kita," katanya.

Hadir sama ialah Timbalan Naib Canselor (Penyelidikan dan Inovasi) Profesor Dato' Dr. Muhammad Jantan, Timbalan Pendaftar (Hal-Ehwal Pelajar dan Alumni) Husin Yahya dan Penasihat Briged Sukarelawan Zulkifli Che Hussein. - Teks: Siti Naquiah Abdillah

Share This

Pusat Media dan Perhubungan Awam / Media and Public Relations Centre

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : pro@usm.my (<mailto:pro@usm.my>)

Laman Web Rasmi / Official Website : [Universiti Sains Malaysia](http://www.usm.my) (<http://www.usm.my>)

[Client Feedback / Comments](http://web.usm.my/smbp/maklumbalas.asp) (<http://web.usm.my/smbp/maklumbalas.asp>) | USM News Portal. Hakcipta Terpelihara USM 2015